

draxt ī āsūrīg

pad nām ī yazdān

draxt-ē rust ēst tar ō šahr āsūrīg

bun-aš hušk ēst sar-aš ēst tarr

warg-aš nay hušk ēst bar-aš mārēd angūr

sīrēn bār āwarēd mardōmān wasnād

ān-um draxt {!} ī buland buz ō ham-nibardīd

kū: az až tō abardar hēm pad was gōnag xīr

u-m pad xwanirah zamīg draxt-ē nēstham-tan

čē šāh až man xwarēd ka nōg āwarēm bār

magōgān taxt hēm frasp hēm wādbānān

gyāg-rōb až man karēnd kē wirāžēnd mēhan ud mār

yawāz až man karēnd kē kōbēnd jaw ud brinj

damēnag až man karēnd adurān waznād

mōg hēm warzīgarān nālēn hēm brahn<-ag> pādā

rasan až man karēnd kē tō pād bandēnd

čob až man karēnd kē tō grīw māžēnd

mēx až man karēd kē tō sar-kūnag wēžēnd

ēzm hem ādurān kē tō sēj brēžēnd

tābistān sāyag hēm pad sar šahrδārān

šīr hēm warzīgarān angubēn āzād-mardān

tabangōg až man karēnd dārūg-dān wasnāδ

šahr ō šahr barēnd bižišk ō bižišk

āšyān hēm murwīžagān sāyag kārdāgān

astag bē abganēm pad nōg būm rōδēd

ka hirzēnd mardōmag kū-m bē nē wināsēnd

bašn-um ēst zargōn yad ō rōz yāwēd

ān-iž mardōmag kē-š nēst may ud nān

až man bār xwarēnd yad amburd awištēnd

ka-š ān wāxt būd draxt āsūrīg

buz im passux karēd: dagr-um frāž ašnawēd

kū tō-iž ō man rānēh tō-iž ō man nibardēh

ka ēd až man kirdagān šanīd

buwēd, nang ō halag saxwan-it {!} padkārēd

burz hē dēw, ī buland bašn-it {!} mānēd dēwān-dēw

kē pad sar šēd yam pad haw farrux āwām

ud rōž, ī dēwān bandag būd hēnd mardōmān {!}

draxt-ē hušk-iž dārū draxt<-ē> sar-aš būd zargōn

tō až ēd kirdagān sar-it {!} ēst zargōn

bē bār burdan sažēd dānāg až duš-āgāh

yad ō ka barēm bār až tō buland abē-sūd

agar-it {!} passux-ē karēm nang-um buwēd garān

wāžēnd im pad afsān parsīg mardōm

kū wāy<-ōmand> hē ud wad xrad. abē-sūd draxtān

yad tō bār āwarēh mardōmān wasnād

gušn-it {!} abar hirzēnd pad ēwēnag čē gāwān

xwad gumanīg ahēm kū rōspīg zādag hē

ašnaw dēw ī buland ī-t az pahikārēm {!}:

ka dādār bay-waržāwind bāmīg xwābar ohrmazd

abēžag dēn ī māzdēnān {!} čē čāšt, xwābar ohrmazd

yud až man kē buz hēm yaštan nē šahēd kēč

čē jīw až man karēnd andar yazišn ī yazdān

gōš-urwan, yazd harwīn čahār-paḏān

haw-iž hōm ī tagīg nērōg až man ēst

haw-iž bār-jāmag če pad pušt dārēnd

yud až man kē buz hēm kardan nē šahēd

kamar až man karēnd aznāyēnd pad murwarīd

mōžag hēm saxtag āzādan wasnāδ

angustbān ī husrawagān šāh <ud> hamharzān

mašk-um karēnd āb-dān pad dašt <ud> wiyābān

pad garm rōz ud rabih sard āb až man ēst

maškīžag až man karēnd kē sūr abar wirāžēnd

stabr sūr ī wuzurg až man sēj wirāžēnd

maškīžag až man karēnd wasnāδ šahrδārān

kē xwadāyān ud dahibēdān <kū> sar ud rēš wirāžēnd

pad škōh <ud> āzarm andar kanār<-um> dārēnd

nāmag až man karēnd frawardag dēwān

daftar ud pādixšīr abar man nibēsēnd

zih až man karēnd kē bandēnd <abar dron>

warak <až man> karēnd waxšīg buz-pašmēn

kē āzādān ud wuzurgān abar doš dārēnd

škanj až man karēnd kē bandēnd zēnān

kē rōdistahm ud spandayād abar bē nišīnēnd

kē pad <haw> mih pīl <ud> zand-pīl dārēnd

bawum zunnār kē pad was kārizar andar kār dārēnd

hambun nē wišāyēd až band zēnān

pīlkahn ud kaškanjīr ān-um xīrān ēwēn

yud až man kē buz hēm kardan nē šahēd

hambān až man karēnd wāzārgānān wasnāδ

ke nān ud pist ud {!} panīr, harwīn rōyn-xwardīg

kāpūr ud mušk ī syā ud xaz ī tuxārīg

was jāmag šāhwār padmōžan kanīgān

pad hambān āwarēnd frāž ō šahr čē ēran

kustīg až man karēnd ān-um spēδ pašm

haw taškanag šāhwār padmōžan wuzurgān

ān-um zanān <ud> kanīg<(an)> pad war<ud> grīw stāyēnd

ēw-um ham-sardag až amā paywand {!}

tan hu-bōδ bōdād čiyōn gul ī gētīg

sru-ē dah widest abāz ō pušt dārēm

kōf ō kōf šawēm wuzurg kišwar būm

až kust ī hindūgān tar ō war-kaš zrēh

yud sardag mardōmag kē mānēnd tar haw būm  
wīdestīg ud war-čašm kē čašm pad war ēst  
sar-šān sag mān<-ēd> brūg-aš<ān>mān<-ēd>mardōm {!??}  
kē dār warg-ē xwarēnd až buz šīr dōšēnd  
haw-iž mardōmag zīwišn až man ēst  
pēš-pārag až man karēnd anōšag-xwar-mān  
kē xwarēd šahrδār kōf-δār ud āzād  
  
ēw-um bēd abardar až tō δraxt āsūrīg  
ud <až> man šīr, panīr bēd afrōšag ud māst  
dūγ-um kašk karēnd wasnaδ šāhīgānān  
māzdēsnašn pādyāb pad man pušt dārēnd  
čang ud win ud kinnār haw barbut ud tambūr  
  
hamāg zanēnd pad man srāyēnd  
ēw-um bēd abardar až tō draxt āsūrīg  
  
ka buz ō wāžār barēnd ud pad wahāg dārēnd  
har kē dah drahm nē dārēd frāž ō buz nē āyēd  
  
xurmā pad dō pašīz kōdakān xrīnēnd  
dān <ud> astag tō šawēd frāž ō kōy murdān

ēn-um sūd ud nēkīh ēn-um dahišn ud drōd

kē až man buz bē rawēd tar im čē pahn būm

ēn-um zarrēn saxwan kē man ō tō wāxt

čiyōn kē pēš xūg-warāž murwārīd afšānēd

ayāb čang zanēd pēš ī uštar ī mast

až band abāz karēnd kū pad bun-dahišnīh

kōfān čarag šawēm ō hu-bōd kōfān

giyāh tarrag xwarēm <ud> až xānīg sard āb

kū guruhagān-mēx tō kust hē ēdar

buz pad pērōžīh šud xurmā andar ō stō

srōd-um kē srāyīd, kē nibišt xwēš, dagr zīwād, pad har srōdān sar dušmin murd  
wenād. kē nihād ud kē nibišt haw-iž pad ham-ēwēn pad gētīg tan husraw ud mēnōg  
bōxtag ruwān. ēdōn bawād.